

SVGA ta celebra nan 55 aniversario na grandi y cu un feria dialuna 9 di December



ORANJESTAD (AAN): Na aña 1964 un grupo di personanan preocupa cu e situacion di e personanan cu un limitacion intelectual a dicidi di haci un investigacion pa wak bou cual circunstancia e personanan aki tabata biba.

Señora C. van de Berg-De Freitas, señor P. Harting

y señor A. de Vries, tabata e pioneronan ariba e tereno aki. Locual nan a haya tabata situacionnan deplorable y pa cual mester a bin cambianan rapido.

Asina a lanta un fundacion dia 9 di December 1964, y a cuminsa traha plannan.

Señora Christina van de Berg-De Freitas tabata activo como presidente te cu 2012. Den e añanan cu a sigui a crea 3 pasadianan (Bibito Pin, Briyo di Solo y Man na Obra), cas pa reemplaza famia (Cas Shabururi) y biba den bario y 1 scol Dun'un man pa enseñanza special.



"55 aniversario"

Den cuadro di nan 55 aniversario kier celebra esaki na grandi y reconociendo cu por sigui mehora. Ta mira cu e Fundacion a crece y a logra realisa hopi di su plannan.

Ta sigui traha pa realisa mas lugar di vivienda y un scol pa e alumnonan cu ta sali di Scol Dun'un man, e Fundacion ta modernizando, trahando cu especialista y sistemanan automatiza.

Ariba tereno di cuido, guia y enseñanza e desaroyo a bay hopi lihe. Ta uza metodonan moderno pa yega na integracion y participacion den nos comunidad y lo sigui traha na un desaroyo maximo di nan clientenan hunto cu mayornan y profesionalnan.

Semper lo keda hopi gradicido na tur cu a traha cu tanto stimacion pa e grupo meta, den e 55 aña cu a pasa y door cu ta hopi no lo menciona nan, pa no laga ningun afo.

Feria di Alegria

A pensa ariba e forma di celebra e fecha aki y algun colega a pensa pa haci algo recreativo y a pidi na e 2 educadornan fisico (Jean

Kock y José Puente) di e departamento di deporte pa organisa esaki. A pensa riba un forma di feria caminda tin hopi actividad recreativo.

Tambe a desea pa pidi ayudo na comunidad pa haya suficiente boluntarianan cu por yuda duna atencion prome, durante y despues di e feria. Aki ta caminda a haya caba IPA, IBiSA.

E fecha di e feria ta Dialuna 9 di December 2019, Ora : 9:30-12:30, Luga : Piedra plat 97A Durante e feria lo tin:

*E wega nan recreativo planifica door di e dos stagaire nan di IPA di IBiSA lo wordo ubica den forma di un circuito

*Cada wega lo tin 3 variacion cu lo por wordo adapta na e nivel di cada participante.

*Lo tin ambiente musical di DJ Alvin.

*Entre e weganan lo ta bay tin tres tent unda cu ta spot nan pa hidrata y come algo durante di e Feria.

*A planea tambe pa pone un tent di prome auxilio y ta spera di por conta cu e ayudo di e instancia di Rode Kruis.

Esaki por logra solamente cu e sosten di comunidad henter.